

四庫全書

史部

欽定四庫全書

史部

唐會要卷

一至六

詳校官編修臣溫汝适

編修臣程嘉謨覆勘

總校官降調編修臣倉聖脉

校對官中書臣陸湘

謄錄監生臣王宮

欽定四庫全書

史部十三

唐會要

政書類一 通制之屬

提要

臣等謹案唐會要一百卷宋王溥撰溥字齊

物并州祁人漢乾祐中登進士第周廣順初
拜端明殿學士恭帝嗣位官右僕射入宋仍
故官進司空同平章事監修國史加太子太
師封祁國公卒謚康定事迹具宋史本傳初

唐蘇冕嘗次高祖至德宗九朝之事為會要四十卷宣宗大中七年又詔楊紹復等次德宗以來事為續會要四十卷以崔鉉監修段公路北戶錄所稱會要即冕等之書也惟宣宗以後記載尚缺溥因復採宣宗至唐末事續之為新編唐會要一百卷建隆二年正月奏御詔藏史館書凡分目五百十有四於唐代沿革損益之制極其詳核官號內有識量

忠諫舉賢委任崇獎諸條亦頗載事蹟其細
項典故不能概以定目者則別為雜錄附於
各條之後人間載蘇冕駁議義例該備有裨
考證今僅傳抄本脫誤頗多八卷題曰郊儀
而所載乃南唐事九卷題曰雜郊儀而所載
乃唐初奏疏皆與目錄不相應七卷十卷亦
多錯入他文蓋原書殘缺而後人妄摭竄入
以盈卷帙又一別本所缺四卷亦同而有補

欽定四庫全書

提要

亡四卷採摭諸書所載唐事依原目編類雖未必合溥之舊本而宏綱細目約畧麤具猶可以見其大凡今據以錄入仍各註補字於標目之下以示區別焉乾隆四十六年十一月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

唐會要卷一百一

宋王溥撰

帝號上

獻祖宣皇帝諱熙

涼武昭王高曾孫嗣涼王歆孫弘農太守重耳之子也

武德元

年六月二十二日追尊為宣簡公咸亨五年八月十五

日追尊宣皇帝廟號獻祖葬建初陵

在趙州昭慶縣界儀鳳二年五月一

日追封為建昌陵開元二十八年七月十八日詔改為建初陵

懿祖光皇帝諱天賜

宣皇帝長子

武德元年六月二十二日

追尊懿王咸亨五年八月十五日追尊光皇帝廟號懿

祖葬啓運陵

在趙州昭慶縣界儀鳳二年三月一日追封為延光陵開元二十八年七月十八日

詔改為啓運陵

太祖景皇帝諱虎

光皇帝第二子

武德元年六月二十二日追

尊景皇帝廟號太祖葬永康陵

在京兆府三原縣界

世祖元皇帝諱曷

景皇帝第三子

武德元年六月二十二日追

尊元皇帝廟號代祖葬興寧陵

在京兆府咸陽縣界

高祖神堯大聖大光孝皇帝諱淵

元皇帝第四子母曰元貞皇后獨孤氏

隋

義寧二年五月二十日受禪于太極殿

年五十三

武德九年

八月八日傳位稱太上皇貞觀九年五月六日崩于大

安宮垂拱前殿

年七十

其年十月庚寅葬獻陵

在京兆府三原縣界

諡曰大武皇帝廟號高祖哀冊文

秘書監虞世南撰

諡冊文

闕

諡議

闕

咸亨五年八月十五日追尊高祖神堯皇帝天

寶八載六月十五日追尊高祖神堯大聖皇帝十三載

二月九日追尊高祖神堯大聖大光孝皇帝年號一

盡武德九年

欽定四庫全書

卷一

宰相十六人

秦王裴寂劉文靜蕭瑀竇抗陳叔達楊仁恭封德彝裴矩高士廉齊王元吉宇文士

及長孫無忌杜

如晦房玄齡

太宗文武大聖大廣孝皇帝諱世民

高祖第二子母曰太穆順聖皇后實

氏

隋開皇十八年十二月戊午生于武功別館武德元

年六月一日封秦王九年六月七日冊為皇太子八月

九日即位于東宮明德殿

年二十七

貞觀二十三年五月二

十六日崩于翠微宮含風殿

年五十二

其年八月庚寅葬昭陵

在京

北府醴泉縣界

諡曰文皇帝廟號太宗哀冊文

中書令褚遂良撰

諡議

闕

咸亨五年八月十五日追尊太宗文武聖皇帝天寶八

載六月十五日追尊太宗文武大聖皇帝十三載二月

九日加尊太宗文武大聖大廣孝皇帝年號一

貞觀二十三年

宰相二十五人

裴寂蕭瑀陳叔達李靖封德彝宇文士及長孫無忌杜如晦房玄齡高士廉溫

房博岑文本魏徵侯君集楊師道戴胄劉洎李世勣張亮馬周褚遂良崔仁師楊弘禮王珪杜淹

高宗天皇大聖大弘孝皇帝諱治

太宗第九子母曰文德順聖皇后長孫氏

貞觀二年六月十三日生於東宮麗正殿二月封晉王

十七年四月七日冊為皇太子二十三年六月一日即

位

年二
十二

咸亨五年八月十五日稱天皇弘道元年十二月四日

崩于東都貞觀殿

年五
十六

文明元年八月庚寅葬乾陵

在京兆府
奉天縣界

諡曰天皇大帝

廟號高宗哀冊文

天后武
氏撰

諡冊文

闕

諡議

闕

天寶八載六月十五日加尊號高宗天皇大聖皇帝十

三載二月六日加尊號高宗天皇大聖大弘孝皇帝年

號十五

永徽七年正月七日改為顯慶顯慶六年二月
三十日改為龍朔龍朔四年正月一日改為麟

德麟德三年正月五日改為乾封乾封三年二月二十九日改為總章總章三年三月十八日改為咸亨咸亨五年八月十五日改為上元上元三年十一月三日改為儀鳳儀鳳三年四月二十二日勅改來年正月一日為通乾元年十二月十日勅停不行至四年六月十五日改為調露調露元年八月二十三日改為永隆永隆二年十月六日改為開耀開耀二年二月十三日改為永淳永淳二年十二月四日改為弘道元年

宰相四十七人

長孫無忌褚遂良于志寧張行成高季輔李世勣柳奭宇文節韓瑗來濟崔敦

禮李義府許敬宗杜正倫辛茂將任雅相盧承慶許圜師上官儀劉祥道竇德玄樂彦暉孫處約姜恪陸敦信戴至德劉仁軌楊武李安期張文瓘趙仁本閻立本李敬玄郝處俊來恒薛元起李義琰高智周張大安裴炎王德真崔知溫郭待舉岑長倩郭正一魏玄同劉齊賢

中宗孝和大聖大昭孝皇帝諱顯

高宗第七子母曰則天順聖皇后武氏

顯慶元年十一月五日生二月二日封周公儀鳳二年

十月三日徙封英王改名哲永隆元年八月二十三日

冊為皇太子弘道元年十二月六日即位

年二十八

嗣聖元年二月六日太后廢帝為廬陵郡王房州安置

聖歷

元年六月遣職方員外郎徐彥伯迎于房州

聖歷元年九月十五日冊為皇太子依舊名顯二年臘

月二十五日賜姓武氏神龍元年二十四日復位於通

天宮端宸殿

年五十二月五日
國號依舊稱大唐

十一月加尊號應天皇

帝三年八月三日加尊號應天神龍皇帝景龍四年六

月二十二日崩于神龍殿

年五十五

景雲元年十一月己酉

葬定陵

在京兆府
富平縣界

諡曰孝和皇帝廟號中宗哀冊文

工部

侍郎徐

諡冊文

闕

諡議

闕

彥伯撰

天寶八載六月追尊號中宗孝和大聖皇帝十三載二

月追尊號中宗孝和大聖大昭孝皇帝年號三

神龍三年九月

改為景龍景龍四年六

月四日改為唐隆元年

欽定四庫全書

唐會要

五

宰相三十八人

安國相王姚元之韋安石唐休璟崔玄暉楊再思張柬之房融韋承慶袁恕已

桓彥範敬暉武三思祝欽明魏元忠李懷遠豆盧欽望韋巨源李嶠于惟謙蘇瓌宗楚客蕭至忠紀處訥張仁

韋韋嗣立崔湜趙彥昭韋溫鄭愔

睿宗玄真大聖大興孝皇帝諱旦

高宗第八子母曰則天順聖皇后武氏

龍朔二年六月一日生于蓬萊宮含涼殿十一月十八

日封殷王乾封元年七月徙封豫王總章二年十一月

十二日徙封冀王改名輪上元三年正月徙封相王永

隆二年又改封豫王仍名旦嗣聖元年二月七日即位

年二
十二 太后臨朝天授元年九月降為皇嗣改名輪聖歷

二年正月六日立為皇太弟固辭不就二月十四日改

封安國相王唐隆元年六月二十四日即位于承天樓

年四
十九

延和元年七月二十五日傳位開元四年五月二十日

崩于百福殿

年五
十五

其年十月庚午葬橋陵

在京兆府
奉先縣界

諡

白大聖玄真皇帝廟號睿宗哀冊文

紫微侍郎
蘇頲撰

諡冊文

闕

諡議

闕

欽定四庫全書

唐書要
卷一

六

天寶八載六月追尊號睿宗玄真大聖皇帝十二載二

月加尊號睿宗玄真大聖大興孝皇帝年號三

景雲二年正月

十九日改為太極太極元年五月改為延和元年

宰相二十五人

平王李嶠蕭至忠張仁亶韋嗣立趙彥昭韋安石蘇瓌唐休璟裴談張錫岑義

崔湜劉幽求鍾紹京李日知薛魏姚元之崔日

用宋璟郭元振張說竇懷正魏知古陸象先

玄宗至道大聖大明孝皇帝諱隆基

睿宗第三子母曰昭成順聖皇后竇氏

垂拱元年八月五日生於東都之別殿

以其日為千秋節後改為長天節

三年閏正月二日封楚王長壽二年臘月降封為臨淄

郡王唐隆元年六月二十一日進封平王七月二十六

日冊為皇太子延和元年七月五日即位

年二十
十八

先天二年十月一日加尊號開元神武聖烈皇帝開元
二十七年二月七日加尊號開元聖文神武皇帝天寶
元載二月十一日加尊號開元天寶聖文神武皇帝七載
五月十三日加尊號開元天寶聖文神武應道皇帝八載
閏六月五日加尊號開元天地大寶聖文神武應道皇
帝十三載二月七日加尊號開元天地大寶聖文神武

證道孝德皇帝至德元年七月二日傳位冊為太上皇

帝三年正月五日加號太上至道聖皇帝乾元元年正

月改尊號太上聖皇天帝元年七月五日崩于神龍殿

年七
十八

廣德元年辛酉葬泰陵

在京兆府奉先縣界

諡曰至道大聖大明

孝皇帝廟號玄宗哀冊文

左散騎常侍王綰撰

諡冊文

闕

諡議

闕

年

號三

先天二年十一月一日改為天寶天寶十五載七月十五日傳位

宰相三十四人

劉幽求韋安石魏知古崔湜陸象先竇懷正岑義蕭至忠郭元振張說姚元之

盧懷慎源乾曜宋璟蘇頲張嘉貞王俊李元絃杜暹蕭嵩宇文融裴光庭韓休裴耀卿張九齡李林甫牛仙客李適之陳希烈楊國忠韋見素崔圓房瑄崔渙

使相八人

源乾曜張說王俊張嘉貞王正杜暹蕭嵩哥舒翰

肅宗文明武德大聖大宣孝皇帝諱亨

玄宗第三子母曰元獻皇后楊氏

景雲二年九月三日生于東宮之別殿

以其日為天平地成節初

諱嗣昇先天元年九月封陝王開元十三年三月徙封忠王改諱浚二十六年三月改諱璿六月三日冊為皇太子三十年九月改諱紹天寶二載改諱亨十五載七

欽定四庫全書

卷一

月十二日即位于靈武殿

年四十六

至德三年正月五日上尊號光天文武大孝感皇帝乾元元年正月加尊號乾元光天孝感皇帝二年正月一日加尊號乾元大聖光天文武孝感皇帝上元二年九月二十一日詔去皇號唯稱皇帝寶應元年四月十八

日崩于長生殿

年五十二

寶應二年三月庚午葬于建陵

在京兆府醴泉縣界

諡文明武德

大聖大宣孝皇帝廟號肅宗哀冊文

兵部侍郎裴士淹撰

諡冊文

閏
諡議

年號五

至德三年三月五日改為乾元乾元
閏四月九日改為上元上元二年九

月二日改為元年以今年十一月為歲首以斗所建辰
為名建巳月改元寶應復以正月為歲首建巳月為四
月

宰相十六人

韋見素崔國房琯裴冕崔漢李麟苗晉卿
張鎬王嶼呂諲李峴第五琦李揆蕭華裴

遵慶
元載

使相八人

裴冕郭子儀李光弼崔
沔崔國張鎬王嶼呂諲

代宗睿文孝皇帝諱豫

肅宗長子母曰
章敬皇后吳氏

開元十四年十月十三日生于中宮之別殿

以其日為
天興節

二十年八月二十一日封廣平郡王諱叙至德二年十月十五日進封楚王乾元元年三月改封成王五月十九日冊為皇太子十月五日改諱豫寶應元年四月二十一日即位

年三十七

二年七月七日加尊號寶應元聖

文武皇帝大曆十四年五月二十日崩于大明殿

年五十四

其年十月己酉葬元陵

在京兆府富平縣界

諡睿文孝武皇帝廟

號代宗哀冊文

中書侍郎崔祐甫撰

諡冊文

闕

諡議

闕

年號三

應

二年七月二十日改為廣德廣德三年正月一日改為永泰永泰二年十月十二日改為大曆

宰相六人

雍王适苗晉卿裴遵慶元載李輔國劉晏

使相十七人

郭子儀李光弼李峴僕固懷恩李懷來王縉辛雲京第五琦杜鴻漸崔圓裴冕田承

嗣朱泚李正己李寶

臣李忠臣李抱玉

德宗神武孝文皇帝諱适

代宗長子母曰睿真皇后沈氏

天寶元載壬戌歲四月十九日生于長安大內之東宮

不置節名

元年建丑月特拜進封奉節郡王寶應元年五月

充天下兵馬元帥進封魯王八月改封雍王十月出鎮

陝州廣德元年拜尚書令元帥如故食實封二千戶賜

鐵券圖形凌煙閣三年冊為皇太子大厯十四年五月

即位

年三十八

建中元年正月加尊號曰聖神文武皇帝貞元二十一

年正月崩于會寧殿

年六十四

十月葬崇陵

在京兆府雲陽縣界

諡曰

神武孝文皇帝廟號德宗哀冊文

刑部侍郎許孟容撰

年號三

建中

盡四年興元一年

貞元盡二十一年

宰相三十人

崔祐甫常袞李勉楊炎盧杞馬燧開播蕭復喬琳劉從一姜公輔盧翰李晟張

延賞韓滉崔造柳渾李泌董晉趙憬陸贄賈耽盧邁崔損趙宗儒鄭餘慶杜佑齊抗高郢鄭珣瑜

使相二十人

郭子儀 朱泚 李實 臣李正己 李忠臣 梁崇義 李希烈 李懷光 陳少遊 李抱真 張孝思

王武俊 劉玄佐 渾瑊 李訥 嚴

震 田緒 劉滋 韋皋 李思古

順宗至德弘道大聖大安孝皇帝諱誦

德宗長子母曰昭德皇后王氏

上元二年辛丑歲正月十二日生於長安之東內

不置節名

大曆十四年六月封為宣王建中元年正月冊為皇太

子貞元二十一年正月即位

年四十五

七月以疾未瘳令皇

太子監國八月傳位居興慶宮稱誥元和元年正月上

尊號曰應乾聖壽太上皇其月十九日崩于興慶宮

年四

十六 七月葬豐陵諡曰至德弘道大聖大安孝皇帝廟號

順宗哀冊文

吏部侍郎
趙宗儒撰

諡冊文

禮部侍郎
崔汾撰

諡議

太常寺
少卿崔

撰

大中三年十二月追崇尊諡曰至德弘道大聖大安孝

皇帝諡冊文

中書侍郎
馬植撰

諡議

兵部尚書
歸融撰

年號一

永貞
一年

宰相七人

賈耽 杜佑 鄭珣 瑜 高郢
韋執誼 杜黃裳 袁滋

使相五人

劉滋 韋臯 李思古
張茂昭 吳少誠

憲宗昭文章武大聖至仁孝皇帝諱純

順宗長子母曰
莊憲皇后王氏

大歷三年戊午歲二月十四日生于長安之東內

不置節名

貞元四年六月封為廣陵王開府儀同三司名淳二十

一年四月冊為皇太子改諱純七月權勾當軍國政事

永貞元年八月即位

年二十

元和三年正月上尊號曰睿聖文武皇帝十四年七月

又上尊號曰元和睿聖文武法天應道皇帝十五年正

月二十七日崩于大明宮之中和殿

年四十三

五月葬景陵

在京兆府奉先縣界

諡曰聖神章武孝皇帝廟號憲宗哀冊文

門下

侍郎令
紙楚撰

謚冊文

戶部侍郎
楊於陵撰

謚議

權知禮部侍郎
李建撰

大中三年十二月追崇尊謚曰昭文章武大聖至仁孝

皇帝謚冊文

左僕射平章
白敏中撰

謚議

兵部尚書太
常卿歸融撰

年號一

和元

盡十

四年

宰相二十一人

賈耽韋執誼杜佑杜黃裳袁滋鄭餘慶
于頔鄭絪武元衡李吉甫韓弘裴相李

藩權德輿李緯張弘靖李貫
之裴度李逢吉王涯崔羣

使相十一人

劉濟李師古張茂昭吳少誠王士真田
季安高崇文裴均王鐔劉總田弘正

穆宗睿聖文惠孝皇帝諱恒

憲宗第三子母曰
懿安皇后郭氏

貞元十一年乙亥歲七月六日生于大明殿不置節名二十

一年四月封為延安郡王名宥元和元年八月進封遂王

七年十月冊為皇太子改諱恒十五年正月即位年二十六

長慶元年七月上尊號曰文武孝德皇帝四年正月二

十二日崩于寢殿年三十十一月葬光陵在京兆府奉先縣界諡曰

睿聖文惠孝皇帝廟號穆宗哀冊文右僕射平章李逢吉撰諡冊

文中書侍郎平章事牛僧孺撰諡議闕年號一長慶四年

宰相十四人韓弘裴度李夷簡皇甫鎔令狐楚張弘靖蕭俛段文昌崔恒杜元穎王播元稹李逢

吉斗

僧孺

使相五人

劉總 田弘 正李
光顏 李愬 劉悟

敬宗睿武昭愍孝皇帝諱湛

穆宗長子母曰
恭僖皇后王氏

元和四年己丑歲六月九日生於東宮之別殿

不置
節名

長壽元年三月封為鄂王尋改為景王二年十二月冊

為皇太子四年正月即位

年一
十六

寶曆元年四月上尊號曰文武大聖廣孝皇帝二年十

二月八日中官蘇明佐等作難帝遇害

年十
八

太和元年七月葬莊陵

在京兆府三原縣界

諡曰睿武昭愍孝皇

帝廟號敬宗哀冊文

司空平章事裴度撰

諡冊文

右僕射竇易直撰

諡議

闕

年號一

寶曆盡二年

宰相七人

杜元穎王播李逢吉牛僧孺李程裴度竇易直

使相三人

李光顏劉浩烏重胤

唐會要卷一

欽定四庫全書

唐會要卷二

宋王溥撰

帝號下

文宗元聖昭獻孝皇帝諱昂

穆宗第二子母曰貞獻皇后蕭氏

元和四年己丑歲十月十日生

以其日為慶成節

長慶元年二月封為江王名涵寶應二年十二月即位

改名昂

年十八

開成五年正月四日崩于大明宮之太和殿

年三十二

八月葬章陵

在京兆府富平縣界

諡曰元聖昭獻孝皇帝廟號文

宗哀冊文

中書侍郎平章事鄭覃撰

謚冊文

中書侍郎平章事李珣撰

謚議

太常少卿

楊敬之撰

年號二

太和盡九年開成五年

宰相二十三人

杜元穎王播李逢吉牛僧孺李程竇易直裴度韋處厚楊嗣復李珣路隋李宗

閔段文昌宋申錫李德裕李固言鄭覃王涯李訓賈餗舒元興李石陳夷行

使相五人

烏重胤史憲誠王智興李載義劉從諫

武宗至道昭肅孝皇帝諱炎

穆宗第五子母曰宣懿皇后韋氏

元和九年甲午歲六月十一日生於東宮

以其日為慶陽節

長慶元年三月封潁王名漻開成五年正月立為皇太

子其年即位

年二十七

會昌二年正月上尊號曰仁聖文武至仁大孝皇帝五

年正月又上尊號曰仁聖文武章天成功神德明道至

神太孝皇帝六年三月改名炎其月二十三日崩

年三十三

八月葬端陵

在京兆府三原縣界

諡曰至道昭肅諡議

禮部侍郎陳商撰

年號一

會昌盡六年

欽定四庫全書

卷二

宰相十五人

李固言 李石 楊嗣復 李珣 崔郾 牛僧孺 崔珙 李德裕 陳夷行 李紳 李讓夷 崔鉉 杜悰

李回

鄭肅

使相四人

劉從諫 王達 王起 何弘敬

宣宗聖武獻文孝皇帝諱忱

憲宗第十三子母曰孝明皇后鄭氏

元和五年庚寅六月二十三日生于大明宮

以其日為壽昌節

長慶元年辛丑封光王名怡會昌六年丙寅三月二十

一日武宗不豫立皇太弟勾當軍國翌日即位改名忱

年三十七

大中二年戊辰正月上尊號曰聖敬文思和武光孝皇

帝大中三年己卯八月七日崩于大明宮

年五

大中十四年二月庚辰葬貞陵

在京兆府雲陽縣界

諡曰聖武獻

文孝皇帝廟號宣宗哀冊文

中書侍郎蔣伸撰

諡冊文

門下侍郎平章

事夏侯

諡議

兵部侍郎鄭穎撰

咸通十三年壬申追崇尊號曰元聖至明成武獻文睿

智章仁神聰懿道孝皇帝年號一

大中十三年

宰相二十三人

李讓夷李紳鄭肅李回白敏中韋琮崔元式李德裕盧商馬植周墀崔龜從任

欽定四庫全書

卷二

銘魏扶令狐綯裴休魏謩崔慎
由鄭朗蕭鄴劉瑒夏侯孜蔣仲

使相十一人

魏謩杜悰崔郾王元逵何弘敬王起
張仲武崔慎由盧耽白敏中鄭注

懿宗昭聖恭惠孝皇帝諱漼

宣宗長子母曰
元昭皇后晁氏

太和七年癸丑十一月十四日生於藩邸

以其日為
延慶節

大中元年丙寅封鄆王名溫大中十三年己卯八月立

為皇太子監國改名漼翌日宣宗崩即位

年二
十七

咸通三年壬午正月上尊號曰睿文明聖孝德皇帝咸
通十二年壬午正月上尊號曰睿文英武明德至仁大

聖廣孝皇帝咸通十四年癸巳七月崩于咸寧殿

年四十一

乾符元年二月甲午葬簡陵

在京兆府富平縣界

諡曰睿文昭聖

恭惠孝皇帝廟號懿宗哀冊文

中書侍郎平章事崔彥昭撰

諡冊文

門下侍郎平

章事王鐸撰

諡議

禮部侍郎崔沆撰

年號一

盡咸通十四年

宰相二十一人

令狐綯白敏中蕭鄴夏侯孜蔣仲杜審權杜悰畢誠楊收曹確高璩蕭寘徐商

路巖于琮韋保衡王鐸劉

瞻劉鄴趙隱蕭倣崔彥昭

使相十人

盧耽何弘敬張允伸何全皞李福崔慎由崔鉉康承訓曹確韋宙

僖宗惠聖恭定孝皇帝諱僖

懿宗第五子母曰惠安皇后王氏

咸通三年壬午五月八日生于東內

以其日為應天節

初封晉

王名儼咸通十四年癸巳七月立為皇太子改名儼是

月懿宗崩即位

年二十

乾符二年乙未正月上尊號曰聖神聰睿仁哲明孝皇帝文德元年戊申二月又上尊號曰聖文睿德光武弘

孝皇帝三月崩于武德殿

年二十七

文德元年十二月葬靖陵

在京兆府奉天縣界

諡曰惠聖恭定孝

皇帝廟號僖宗哀冊文

中書侍郎平章事孔緯撰

謚冊文

門下侍郎平章事韋

昭度
謚議
右丞權知禮部
侍郎抑玘撰

年號五
乾符七年改廣明元
年廣明二年改中和

元年中和五年改光啟元
年光啟四年改文德元年

宰相二十三人

蕭倣 崔彥昭 鄭畋 盧携 王鐸 李蔚 鄭從
諱 崔沆 豆盧瑑 王徽 裴澈 蕭遘 韋昭度

鄭昌圖 杜讓能 孔緯 張濬 韋保
衡 趙隱 劉鄴 裴坦 鄭昭 裴流

使相六十人

王鐸 鄭從諱 高駢 李可舉 王重榮 李克用
陳敬瑄 朱玫 孫惟晟 李巨威 張均 李孝德

陳珣 鍾傳 李鋌 李茂貞 朱全忠 王處存 東方達 令狐綯
杜悰 路巖 曹確 杜審權 趙隱 李蔚 韋昭度 鄭畋 李都 崔
安潛 周寶 張允 仲王 銘 劉鄩 王重盈 王行瑜 李昌言 李
昌仁 李昌符 齊克儉 齊克讓 楊師立 朱瑄 滿存 樂彦貞
劉巨客 李希昌 韓君雄 韓簡 在王 思恭 朱最安 師儒 周
岌 秦宗權 楊全正 楊守亮 楊守忠 楊守信 崔彥 明 曹晟

昭宗聖穆景文孝皇帝諱曄

懿宗第七子母曰安惠皇后王氏

咸通八年三月二十三日生于東內

以其日為嘉會節

十三年壬辰四月封壽王名傑乾符四年丁酉遙鎮幽州又名敏

文德元年戊申三月立為皇太弟監國翌日即位并改

名曄

年二十

大順元年庚戌正月上尊號曰聖文睿德光武弘孝皇帝

天祐元年甲子八月梁王密令蔣玄暉等弑于東都椒

殿

年三十八

葬和陵

在河南府緱縣界

諡曰聖穆景文孝皇帝廟號

昭宗哀冊文

中書侍郎平章事柳璨撰

諡冊文

右僕射平章事裴樞撰

諡議

太

卿王溥撰年號七

龍紀二年改大順大順三年改景福景福三年改乾寧乾寧五年改光化光化四年

改天復天復四年改天祐

宰相二十五人

韋昭度孔緯杜讓能張濬劉崇望崔昭緯徐彥若鄭延昌王搏崔胤李璣陸扆

孫偓鄭紫朱拱崔遠裴贄裴樞王溥獨孤損柳璨陸希聲蘇檢盧光啟韋貽範

使相三十九人

李鋌張全義孫惟晟王重盈錢鏐羅弘信李罕之雷滿王建趙匡凝成汭孫德

欽定四庫全書

卷二

昭周承誨李匡威楊守信張鈞陳鳳趙德種崔安潛董
彥張漢瑜韋昭度王鎔王處直陳敬宣朱瑄時溥王拱
杜漢劉崇望朱全忠李思恭王行瑜李
茂貞王正李守亮楊守忠顧彥明曹晟

哀皇帝諱祝

昭宗第九子母曰
積善太皇后何氏

景福元年壬子九月三日生于大內

以其日為
乾和節

乾寧四年丁巳封輝王名祚天復三年癸亥二月拜開
府儀同三司充諸道兵馬元帥天祐元年甲子昭宗崩

翌日蔣玄暉矯遺詔以帝即位改今名

年十
三

天祐四年丁卯三月禪位于梁梁奉帝為濟陰王遷於

曹州明年二月遇害前刺史氏叔宗之第

年十七

葬濟陰

之定陶鄉諡曰哀皇帝

後唐莊宗初就故陵置園邑有司請諡曰昭宣光烈孝皇帝廟

號景宗中書復奉據少帝行事不合稱宗存諡而已知禮者亦以昭宣之諡非宜

年號一

盡天祐四年

宰相六人

張樞獨孤損崔遠柳璨張文蔚楊涉

使相十三人

王師範錢鏐韓建張全義王鎔羅紹威劉仁恭朱全忠王處直李茂貞趙德諱王建

趙匡
凝

雜錄

大曆十四年七月禮儀使吏部尚書顏真卿上言高祖

至肅宗七聖廟號尊號名文字繁多皇帝則悉有大聖之號皇后則盡有順聖之名使言之者惑於今行之者異於古請高祖以下累聖諡號悉取初諡為定謹按舊制上諡號高祖為武皇帝太宗為文皇帝高宗為天皇大帝中宗為孝和皇帝睿宗為聖真皇帝玄宗為孝明皇帝肅宗為孝宣皇帝其廟號如故仍請準漢魏及國朝故事於尚書省議定奏御乃令尚書省議之時以諡號前後繁多不經儒學之臣思改者久矣會真卿上奏

皆謂必克正焉而兵部侍郎袁儉官以兵達不詳典故
乃上言陵廟中玉冊既刊矣不可輕改遂罷之儉曾不
知陵中玉冊實紀其初號後雖追尊而冊文如故
興元元年正月上在奉天頒罪己之詔讓去徽號其後
雖翦大盜復天步羣臣屢請終不許焉

元和十五年四月禮儀使奏羣臣告天請大行皇帝諡
準禮及故事合集中書門下御史臺五品以上尚書省
四品以上于南郊告天畢議定然後連署奏聞

太和七年十二月宰臣王涯等四人上表請冊徽號不許至開成二年二月因御紫宸殿宰相鄭覃李固言李石等以請諸道節度觀察使頻有表章以加徽號為請上固謙抑不允其月自朔至晦諸道節度觀察使請上徽號者凡二十餘道或再請三請者皆報不許焉

大中三年十二月二十五日追尊順宗憲宗諡號初羣臣以河湟既復請加尊號上深執謙讓三表不許曰河湟已復繼承先志朕欲追尊順宗憲宗諡號以成功烈

其事如何宰臣白敏中等對曰臣等愚昧思慮所不及故遂行之至冊日上御宣政殿百僚拜訖乃降階受玉冊于太尉拜受訖授禮官將奉迎以退上俯俛不瞬目送使者流涕嗚咽俟太尉奉策出升殿羣臣莫敢動焉先是中書門下奏追尊二祖儀注皇帝行事與差官展禮舊記不同禮許從宜不必法古臣等商量其日皇帝于宣政殿受玉冊遣宰相已下持節奉冊赴太廟庶協典禮詔可之

天祐二年三月起居郎蘇楷議昭宗諡號曰皇帝御宇宙治亂以審汙隆宗祀配天資諡以定升降故臣下君

上皆不得而私也有司先定尊諡曰聖穆景文孝皇帝
廟號昭宗按後漢和帝安帝順帝緣非功德遂加尊稱
亦允臣下之請今郊禋有日祫祭惟時伏望別議新廟
之稱庶協先朝罪已之德于是太常卿張延範改諡曰
恭靈莊閔孝皇帝廟號襄宗

措禮部尚書循之子凡劣無藝乾寧二年應進士登

第物論以為濫昭宗命翰林學士陸扆祕書監馮渥復試黜落不許再入舉場措負愧銜怒至是與起居郎羅扆起居舍人盧鼎連署議措目不知書其文羅扆所作蓋時政出賊臣哀帝亦不能制之也

追諡皇帝

孝敬皇帝諱弘

高宗第五子永徽六年正月封代王七年六月六日冊為皇太子上元二年四月

月二十五日薨于合璧宮倚雲殿正月五日贈諡曰孝敬皇帝

殤皇帝重茂

中宗第四子聖曆三年臘月封北海郡王神龍元年二月改封溫王景龍四年六月

冊為皇太子七月即王位二十四日讓位于睿宗降封溫王景雲二年正月改封襄王集州安置開元二年四月薨于房州年十

七追諡殤皇帝

讓皇帝憲

睿宗長子本名成器文明元年立為皇太子及睿宗降為皇嗣更改為皇孫後為蔡王又

為宋王復為寧王開元二十年薨追冊讓皇帝葬惠陵

奉天皇帝琮

玄宗長子本名嗣直封刺王改名潭又名琮天寶十載薨諡靖德皇太子肅宗元年

欽定四庫全書

卷二

追冊為奉天

皇帝葬齊陵

承天皇帝倓

肅宗第三子本封建寧郡王薨實慶初贈封齊王大厯三年追封承天皇帝葬順陵

雜錄

龍朔元年孝敬命太子賓客許敬宗等于文思殿博採古今集摘其英詞麗句以類相從勒成五百卷名曰瑤山玉彩表上之賜物三萬段總章元年二月勅征遼軍逃亡限內不首及更有逃亡者身並處斬家口沒官孝敬上表切諫請免其配沒從之其月親釋奠司成館因

請贈顏回太子少師曾參太子少保制並從之咸亨二年駕幸東都太子監國時屬大旱關中饑乏取廟下兵馬糧視之見有食榆皮蓬實者乃令衆寺各給米使足時義陽宣城二公主以母得罪幽于掖庭太子見之驚惻遽奏請出降又請以同州沙地分借貧人詔並許之承天皇帝倓既為張良娣所譖肅宗怒而幽死又欲搖動代宗時代宗收復兩京遣判官李泌入朝獻捷從容語及倓事泌曰臣幼稚時念得黃臺瓜辭陛下聞其說

乎高宗天帝有子八天后所生子自為行第故睿宗第四長曰孝敬皇帝弘為太子監國仁明孝悌天后方圖臨朝乃鳩殺之立雍王賢賢每自憂惕知必不保全與二子同侍父母之側無由敢諫乃作黃臺瓜辭令樂工歌之冀天后聞之哀愍辭曰種瓜黃臺下瓜熟子離離一摘使瓜好再摘令瓜稀三摘尚自可四摘抱蔓歸太子賢終為天后所逐死于黔中陛下有今日運祚已一摘矣慎無再摘上愕然曰卿安得有是言自是奪宗之

計不行

玄宗嘗與讓帝憲及岐王範等書曰昔魏文帝詩云西山一何高高殊無極上有兩仙童不飲亦不食賜我一丸藥光輝有五色服藥四五日身體生羽翼朕每思服藥而生羽翼何如骨肉兄弟非天生之羽翼乎夫陳思王有超代之才堪任經國之務絕其朝謁卒令憂死魏祚未終遭司馬宣王之奪豈神丸之効也虞舜之聖捨傲象之憊以親九族九族既睦平章百姓此為帝王

之軌則于今數千歲天下歸善焉朕未嘗不廢寢忘餐
欽歎也頃因餘暇妙選仙經得此神効方古老云服之
必驗今分此藥願與兄弟同保長齡永無限極時申王
等皆先薨唯憲獨在上尤加恩貸每至憲生日必幸其
宅移時宴樂居常無日不賜憲酒酪及異饌等尚食總
監及四方有所進獻食稍甘即皆分以賜之憲奏請年
終錄付史館每年至數百紙

開元二十九年冬十月京城寒甚凝霜封樹學者以為

春秋雨木冰即是亦名樹介言其象介冑也憲見而歎
曰此俗為樹架者也諺曰樹生架達官怕必有大臣當
之我其死矣其年十一月薨上聞之號呼失聲左右莫
不掩淚

唐會要卷二

欽定四庫全書

唐會要卷三

宋 王溥 撰

皇后

宣皇帝皇后張氏諡宣獻咸亨五年八月十五日追諡
光皇帝皇后賈氏諡光懿咸亨五年八月十五日追諡
景皇帝皇后梁氏諡景烈咸亨五年八月十五日追諡
元皇帝皇后獨孤氏諡元貞武德元年六月二十二日

追諡

高祖皇后竇氏武德元年六月二十二日追諡穆皇后
貞觀九年五月九日追尊太穆神皇后天寶八載六月
十五日追尊太穆順聖皇后

太宗皇后長孫氏武德九年八月二十一日立為皇后
貞觀十年五月二十六日崩于立政殿

年四十六

諡曰文德

皇后咸亨五年八月追諡文德聖后天寶八載六月加
尊號文德順聖皇后

高宗皇后王氏永徽元年正月立為皇后六年十月十三日廢為庶人

天后武氏貞觀十年文德皇后崩太宗聞武士彟女有才貌召入宮以為才人時上在東宮因入侍悅之太宗崩隨嬪御之例出家為尼感業寺上因忌日行香見之武氏泣上亦潛然時蕭良娣有寵王皇后惡之乃召入宮潛令長髮欲以間良娣之寵既入宮待之踰于良娣立為昭儀良娣王皇后協心謀之遞相譖毀上終不納俄

誣王皇后與母柳氏求厭勝之術昭儀所生女暴卒又奏王皇后殺之上遂有廢立之意上從容言后無子以風長孫無忌無忌竟不順旨永徽五年中書舍人李義府上表請廢王皇后立昭儀以厭衆庶之心上悅謂李勣曰立昭儀之事褚遂良固執不從遂良既是顧命大臣事不可當止也勣遂密奏曰此事陛下家事何須更問外人許敬宗又言于朝曰田舍翁積得十斛麥尚欲換却舊老婦況天子富有四海立一皇后有何不可闕

諸人何事妄生異議上意乃定遂立為皇后顯慶五年
十月已後上苦風眩表奏時令皇后詳決自此參預朝
政幾三十年當時畏威稱為二聖咸亨五年八月十五
日稱天后弘道元年十二月高宗崩十二月皇太子即
位尊為皇太后臨朝攝政載初元年九月九日即位改
國號稱周賜帝姓武氏神龍元年正月二十三日傳位
于中宗二十六日徙居上陽宮二十七日上尊號則天
大聖皇后十二月二十六日崩于洛陽宣居殿

年八十一諡

曰大聖則天皇后國子司業崔融為哀冊文二年五月二十八日祔葬乾陵唐隆元年七月七日依舊為皇后景雲元年十月十八日改為大聖天祐延和元年六月十七日又改為天后其年八月五日改為聖后開元四年十二月改為則天后天寶八載六月十五日追尊號

則天順聖皇后年號二十

嗣聖二年二月七日改為文明文明年九月五日改為

光宅光宅二年正月一日改為垂拱垂拱五年正月一日改為永昌永昌五年十一月一日改為載初載初元年九月九日稱周改為天授天授三年四月四日改為如意如意元年九月九日改為長壽長壽三年五月十

日改為延載延載二年三月一日改為證聖證聖元年
九月二十九日改為天冊萬歲天冊萬歲二年臘月改
為萬歲登封萬歲登封元年四月一日改為萬歲通天
萬歲通天二年九月九日改為神功神功二年正月一
日改為聖歷聖歷三年五月五日改為久視久視二年
正月五日改為大足大足元年十月二十三日改為長
安長安五年正月
一日改為神龍

宰相七十四人

劉仁範薛元超裴炎岑長倩郭待舉魏
玄同劉齊賢韋弘敏胡元範王德真劉

祿之武承嗣竇味道崔察李景謏韋方質沘諒裴居道
韋思謙蘇良嗣韋待價張光輔王本立范履冰邢文偉
武攸寧傅遊藝史務滋宗泰客格武樂思誨任知古歐
陽通裴行本狄仁傑楊執柔李遊道袁弘智崔神基崔
元綜李紹德姚壽李元素王璿婁師德韋巨源陸元方
豆盧欽望蘇味道王考傑武士方揚再思杜景倫周允

元孫元亨李道廣王方慶王及善宗楚客武三思吉頊
李嶠張錫韋安石李懷道顧琮李迥秀朱敬則唐休璟
韋嗣立崔玄暉張
來之房融韋承慶

中宗皇后趙氏天寶八載六月十五日追尊思和皇后
皇后初為英王妃母常樂公主得罪妃坐廢幽死于內
侍省中宗崩將葬于定陵莫知瘞所將行招魂附葬之
禮太常博士彭景曰招魂葬禮非古不可備棺槨置輶
輶宜據漢書郊祀志葬黃帝衣冠于橋山遂以皇后禭
衣于陵寢行宮招魂置衣魂輦以太牢告祭遷衣于玄

宮御捐之右覆以夷衾焉

皇后韋氏神龍元年十二月十二日立為皇后十一月
二日尊為順天皇后三年八月十五日加順天翼聖皇
后唐隆元年六月二十日降為庶人初神龍元年十二
月侍中桓彥範上表曰昔孔子論詩關雎為始言后妃
者人倫之本理亂之端也故皇英降而虞道興任姒歸
而周宗盛桀奔南巢禍階末喜魯桓滅國惑以齊媛伏
見陛下每臨朝聽政皇后必施帷幔坐于殿上得聞政

事愚歷選列辟求詳往代帝王有與婦人謀及政者莫
不破國亡身傾軛繼路且以陰乘陽違天也以婦凌夫
違人也違天不祥違人不義由是古人譬以牝雞司晨
惟家之索易曰无攸遂在中饋言婦人不得親于國政
也伏願鑒古人之言察古人之意上以社稷為重下以
蒼生為念宜令皇后無往正殿干及外朝專在中宮聿
修陰教則坤儀式固鼎命維新

睿宗皇后劉氏唐隆元年六月二十八日贈皇后景雲

二年二月二十三日追諡肅明皇后天寶八載六月十五日追尊肅明順聖皇后

皇后竇氏唐隆元年贈皇后景雲二年追諡昭成天寶八載追加昭成順聖皇后贈諡日月並與肅明皇后同
玄宗皇后王氏長壽二年納為妃先天元年八月二十日立為皇后開元十二年七月二十一日廢為庶人

皇后楊氏至德二年六月二十四日追尊皇后諡曰元獻立廟于太廟之西四時薦享皆準太廟一室之儀至

寶應二年四月遷神主于太廟祔玄宗室

皇后武氏恒安王攸止女攸止卒後后尚幼隨例入宮
及王皇后廢賜號惠妃宮中禮秩一同皇后開元二十
五年十二月七日薨年四十贈皇后諡曰貞順仍立廟
于京師昊天觀之角乾元之後享祀仍停初十四年四
月侍御史潘好禮聞上欲以惠妃為皇后進疏諫曰臣
嘗聞禮記曰父母之讎不共戴天公羊傳曰子不復父
讎不子也昔齊襄公復九世之讎丁蘭報木母之恩春

秋美其義漢史稱其孝陛下既不以齊襄為法丁蘭為
戒豈得欲以武氏為國母當何以見天下之人乎不亦
取笑于天下乎非止虧損禮經實恐污辱名教又惠妃
再從叔三思從父延秀等並干朝綱亂常遽窺神器豺
狼同穴梟獍同林至如惡木垂陰志士不息盜泉飛波
貞夫莫飲良有旨哉且匹夫匹婦欲結夫妻者尚相揀
擇況陛下是累聖之貴天子之尊乎伏願陛下詳察古
今鑒戒成敗慎擇華族之女必在禮義之家稱神祇之

心允億兆之望為國大計其在于茲且惠妃本是左右
執巾幘者也不當參立之春秋書宋人夏父之會無以
妾為夫人齊桓公誓命于葵丘亦曰無以妾為妻此則
夫子恐開窺競之端深明嫡庶之別又漢成帝欲立趙
氏為皇后劉輔極言漢桓帝欲立亳氏于中宮李雲切
諫又見人間盛言尚書左丞相張說自被停知政事之
後每諂附惠妃誘蕩上心欲取立后之功更圖入相之
計伏願杜之于將漸不可悔之于已成且太子本非惠

妃所生惠妃復自有子若惠妃一登宸極則儲位實恐不安皇太子既守器承祧為萬國之主本何可輕易輒有搖動古人所以見其漸者良以是也昔漢高祖以戚夫人之故將易太子之位時有商山四皓雖不食漢庭之祿尚能輔翼太子況臣愚昧職參憲府慷慨關心感激懷憤陛下留神省察

蘇冕駁曰此表非潘好禮所作且好禮先天元年為侍御史開元十二年為温州刺史致仕表是十四年

獻而云職參憲府若題年恐錯即武惠妃先天元年
始年十四王皇后有寵未衰張說又未為右丞相竟
未知此表是誰獻之

肅宗皇后吳氏寶應元年五月十九日追尊皇后諡曰
章敬

皇后張氏至德二年十二月十五日良娣張氏冊為淑
妃乾元元年三月六日立為皇后寶應元年有罪幽死
別所

代宗皇后獨孤氏大厯十年追尊曰貞懿皇后十月十六日忌

皇后沈氏開元末選入宮天寶末以祿山犯闕玄宗西狩棄妃故為賊所得拘于東都之掖庭代宗收東都見之留宮中及史思明再犯河洛遂失所在十餘年求之不得至德宗即位建中元年八月追尊為皇太后遂以睦王述為奉迎皇太后使工部尚書喬琳為副昇平公主宜備起居侯知行在即嚴扈法駕奉迎至二年二月

羣臣以皇太后問至稱賀既而謬焉四方詐稱太后者數四至永貞元年九月禮儀使奏太皇太后沈氏厭代登真于今二十有七年大行孝皇帝至孝惟深哀思罔極建中初已發明詔舟車所至靡不週遍歲月滋深迎訪理絕謹按晉庾蔚之議云尋求三年之外又俟中壽而服之今參詳禮經博稽故事伏請以大行皇帝啟攢宮日皇帝百官舉哀于肅章門內之正殿先令有司造禕衣一副發哀日令內官以禕衣置于幄坐自後令宮

人朝夕上食先告元陵次告宗廟上太皇太后謚冊次
造神主擇日祔代宗廟其祿衣奉法駕奉遷于元陵祠
殿置于代宗皇帝袞衣之右便以今年十一月二日發
哀為忌追冊曰睿真皇后從之

德宗皇后王氏貞元二年十一月冊為皇后其月二十
一日忌三年正月上尊謚曰昭德皇后其謚冊文初令
兵部侍郎李紆撰上以紆謂皇后為大行皇后非也詔
學士吳通玄又云咨后王氏亦非也按貞觀中岑文本

撰文德皇后諡冊文曰皇后長孫氏斯得之矣其年二月皇后發引梓宮進辭太廟于永安門升顯輅車于安福門從陰陽之吉也三月以皇后廟樂章九首付有司令議廟舞之號禮官請號坤元之舞從之其樂章初令宰臣張延賞柳渾等撰及進留中不下又命翰林學士吳通玄為之時上務簡約不立廟令于陵所祠殿奉安神主三年正月十八日太常博士李吉甫奏曰准國朝故事昭成皇后肅明皇后元獻皇后並置別廟若于大

行皇帝陵所祠殿奉安神主禮經典故檢討無文伏以
元獻皇后廟在太社之西今請修葺以為大行皇后別
廟勅旨宜依仍付所司至三年二月二十七日翰林待
詔楊季炎等奏奉進止宜于兩儀殿虞祭畢擇日祔廟
准經勘擇用三月十八日一時兩儀靈座便請除之詔
下太常詳求典故太常卿董晉與博士李吉甫張薦等
奏曰伏惟古禮合用今年七月卒哭祔廟國朝故事高
祖六月而葬睿宗十月而葬並葬訖便卒哭祔廟聖朝

金史卷三
典故伏請遵仍令所司于今月十八日已前擇卒哭位
哭訖以十八日祔廟制曰可

順宗皇后王氏永貞元年八月冊為皇后元和元年五
月冊為皇太后十一年三月四日忌

憲宗皇后郭氏元和五年閏正月冊為皇太后大中二
年五月二十一日忌其年七月上尊諡曰懿安皇太后
皇后鄭氏會昌六年四月上尊號曰皇太后大中元年
上尊號曰孝明皇太后

穆宗皇后王氏長慶四年二月冊為皇太后會昌四年正月十二日忌五年四月上尊諡曰恭懿僖皇太后

皇后蕭氏寶應三年三月冊為皇太后大中元年四月十五日忌其年八月上尊諡曰正獻皇太后武宗母也

敬宗皇后

史闕

文宗皇后

史闕

武宗皇后鄭氏

宣宗皇后晁氏大中十三年九月上尊諡曰元昭皇太后

懿宗皇后王氏咸通十四年八月冊為惠安太后文德

元年四月上尊諡曰恭獻皇太后

僖宗皇后

史闕

昭宗皇后何氏光化元年四月冊為皇后天祐元年冊為皇太后居積善宮天祐二年十二月為梁王密遣人所害

雜錄

開元四年正月大理少卿李衢奏奉進止令修皇后譜牒事伏請降明勅奉勅宜依仍令戶部量事供其紙筆

貞元二年十二月有司以皇后在殯請禁公私聲樂詔曰大行皇后喪民庶之間並以除服緣情制禮須使合宜其太常權停教習京城及諸府任舉樂音

三年正月詔中書門下兩省及常參官各宜撰大行皇后挽歌詞三首其月詔內外諸親設祭于大行皇后並不假飾花果已後公私集會並宜準此初皇后母郕國夫人鄭氏等請設祭可之自是宗室諸親及李晟渾瑊神策六軍大將皆請設祭自啓攢宮後日有數祭至于

將遷座乃止

元和十一年三月順宗皇后王氏崩于南內之咸寧殿
諡曰莊憲初太常少卿韋勳進諡議公卿署定欲告天
地宗廟禮院奏議曰謹按曾子問賤不誄貴幼不誄長
禮也古者天子稱天以誄之皇后之諡則讀于廟江都
集引白虎通曰皇后何以諡之諡之于廟又曰皇后無
外事無為于郊傳曰故雖天子必有尊也準禮賤不得
誄貴子不得爵父母所以必諡于廟者諡宜受成于宗

廟故天子諡成于郊皇后諡成于廟今請準禮集百官
連署諡狀訖讀于太廟然後上諡于兩儀殿既符其事
允合禮經從之其年四月西川節度使李儀簡遣使往
南詔告皇太后哀凡天子之喪嗣天子以卿大夫告于
四夷太后皇后之喪則方鎮告之故事也

時以太后崩
不聽政欲準

故事冢宰以總百官宰相禮儀裴度獻議曰冢宰是殿
周六官之首既掌邦禮實統百司故王者諒陰百官權
聽之制後代設官既無此號不可虛設且國朝故事或
置或否古今異制不必因循其諸司公事望請中書門
下處分
其年七月禮儀使奏自秦漢以來天子之后稱
者從之

皇后母稱皇太后祖母稱太皇太后加太字者所以加尊稱也國朝典禮皆稱舊制開成六年正月太常奏昭成皇太后諡號已牒禮部禮部以太字非之太常報曰入廟稱后義係于天在廟稱太后義係于祖並載在史策垂之不朽今百司文牒及奏狀參詳典故恐不合除太字如諡冊入陵神主入廟即當去之奏可十五年五月莊憲皇太后弟故左金吾衛大將軍王用妻胡氏進狀云請用姑莊憲皇太后蔭補千牛中書門下稱准格

無條伏見貞元中沈翬用姑睿真皇太后蔭元和中妾
第二男浩亦用皇太后蔭伏乞天恩允妾所奏可之仍
入格令

天祐元年九月冊昭宗皇后何氏為皇太后中書門下
奏請太后宮請以積善為名從之

內職

舊制皇后之下有貴妃淑妃德妃賢妃各一人為夫人
正一品昭儀昭容昭媛修儀修容修媛充儀充容充媛

各一人為九嬪正二品婕妤九人正三品美人九人正四品才人九人正五品寶林二十七人正六品御女二十七人正七品采女二十七人正八品以備周禮六宮之數其外又有尚宮尚儀尚服尚食尚寢尚功分掌宮中服御藥膳之事宮正糾愆失彤史紀功書過龍朔二年改易官名置贊德二人正一品以代夫人宣儀四人正二品以代九嬪丞門五人正四品以代美人承旨五人正五品以代才人衛仙六人正六品以代寶林供奉

八人正七品以代御女持節二十人正八品以代采女
又置侍中三十人正九品咸亨二年復舊高祖太宗黜
隋之亂政未下車而大放宮女正位配尊惟其舊高祖
之職備員而已所謂刑于內以正乎外及高宗永徽之
後政出宮中公卿大夫罔不憚服其取威也多山陵未
畢而冢嗣再廢遂掘翦王室改立宗社非一朝一夕之
故其所由来漸矣及中宗追王韋氏崇寵三思使以先
闕事尊訪之于是慶雲之瑞宣于朝廷桑女之歌布于

天下防閑之道大壞亂逆之謀預召矣卒以禍敗為後

王誠

懿宗淑妃郭氏

生同昌公主帝在藩邸常經重疾妃侍醫藥見黃龍出入臥內既間妃以異告

帝曰慎勿言之貴必不相忘

婕妤崔氏王氏

雜錄

貞觀十三年二月二十五日尚書八座議曰謹按王者正位作為人極朝有公卿之列室有嬪御之序內政修而家理外教和而國安爰自周代洎乎漢室名號損益

時或不同然皆寤寐賢才博採淑令非唯德洽宮壺抑亦慶流邦國近代以降情溺私寵掖庭之選有乖故實或微賤之族禮訓蔑聞或刑戮之家怨憤充積而濫叨名級入侍宮闈即事而言竊未為得臣等伏請今日以後後宮及東宮內職員有關者皆選有才行充之若內無其人則旁求于外采擇良家以禮聘納

永徽六年十月武后未立上特號為宸妃侍中韓瑗中書令來濟奏言帝王嬪妃自有恒數今若別立妃號臣

等竊以為不可乃止

貞元六年七月九日太常卿崔縱奏謹按司封令及六
典王母為太妃高祖宇文昭儀生韓王元嘉後為韓國
太妃太宗燕妃生越王貞後為越國太妃今諸王母未有封
號請遵典故其月吏部郎中柳冕者狀稱歷代故事及
六典無公主母稱號臣謹約文比義公主母既因公主
而貴伏請降于王母一等命為太儀各以公主本封加
太儀之上旨依

元和四年德宗皇帝妃韋氏卒廢朝三日妃祖濯尚中
宗女定安公主官至衛尉少卿父會昌中為義王駙馬
妃少入宮性敏順善于承奉德宗重之遂冊為妃六宮
服其德崇陵復土畢于園寢終三年之制至是卒寶應
元年四月禮院奏贈梁國夫人

尚宮宋氏葬奉勅令所司供鹵簿準故事只合給儀仗
詔以鼓吹賜之宋氏姊妹五人皆有文學貞元中澤潞
節度使李抱真貢至闕下德宗召入宮試兼問經史文

義深加賞歎自後皇太子及諸王公主等多從受學姊
妹中尚宮尤通達人事自憲宗穆宗呼為先生其名實
根本具在憲宗實錄其年七月勅殿中上奉御郭環曾
祖故陳州刺史崇可封工部尚書曾祖母唐氏贈晉昌
郡夫人祖母李氏可贈隴西郡夫人父右威衛將軍義
可贈禮部尚書以姊妹才人有寵故也未為妃后一旦
褒贈榮及祖禰前例無之

天祐二年九月六日內出宣旨乳母楊氏可賜號昭儀

乳母王氏可封郡夫人第二乳母先帝已封郡夫人可
準楊氏例改封中書奏議言乳母古無封夫人賜內職
之例近代因循殊乖典故昔漢順帝以乳母宋氏為山
陽君安帝乳母王聖曰野王君當時朝議猶或非之唯
中宗封乳母于氏為平恩郡夫人尚食高氏為修國夫
人今國祚中興禮儀革舊臣等商量楊氏望賜號安聖
君王氏福聖君第二王氏康聖君從之其年十二月勅
宮嬪女職本備內任近年以來稍失禮儀今後每遇延

英坐朝日只令小黃門祇候引從宮人不得擅出內

出宮人

武德九年八月十八日詔王者內職取象天宮上備列宿之序下供掃除之役肇自古昔具有節文宋代奢淫搜算無度朕顧省宮掖其數實多憫茲深閉久離親族一時減去各從娶聘自是中宮前後所出計三千餘人貞觀二年春三月中書舍人李百藥上封事曰自陛下受命已來昭示天下薄賦輕徭恤刑慎獄躬行節儉減

損服御雖堯舜德音無以過此然陰氣鬱積亦恐是旱
之咎徵往年雖出宮人未為盡善竊聞大安宮及掖庭
內無用宮人動有數萬衣食之費固自倍多幽閉之冤
足感和氣亢陽為害亦或由茲至七月三日上謂侍臣
曰婦人幽閉深宮情實可愍隋氏末年求采無已此皆
竭人力朕所不取且洒掃之餘更何所用今將出之任
求伉儷非獨以省費息人亦各得遂其性於是命尚書
右丞戴胄給事中杜正倫等于掖庭西門簡出之

開元二年八月十日詔曰古者三夫人九嬪二十七世婦八十一御女以備內職焉朕恭膺大寶頗修舊號而六宮曠位未副于周禮八月算人不行于漢法至于姜后進諫永巷脫簪表盜有言上林引席此則朕之所慕未曾忘也頃者人頗喧譁聞于道路以為朕求聲色選備掖庭豈余志之未孚何斯言之妄作往緣太平公主選人入宮朕以事雖順從未能拒抑見不賢莫若自省欲止謗莫若自修改更而張損之可也妃嬪已下朕當揀

擇使還其家宜令所司將車牛今月十二日赴崇明門待進止

大厯十四年五月出宮人數百人

貞元二十一年三月出後宮人三百人其月又出後宮及教坊女妓六百人聽其親戚迎于九仙門百姓莫不叫呼大喜

元和八年六月出宮人二百任其嫁配十年十二月出宮人七十人

長慶四年二月勅先在掖庭宮人及逆人家口并配內園者並放出外任其所適其月赦文宮中老年及殘疾不任使役并有父母者並委所司選擇放出

寶曆二年十二月勅在內宮人宜放三千人願嫁及歸近親並從所便不須尋問

開成三年二月文宗以早出宮人劉好奴等五百餘人送兩街寺觀任歸親戚翌日因對紫宸宰相李珣曰陛下放宮女數多德邁千古漢制八月算人晉武平吳亦

多採擇仲尼所謂未見好德如好色者宰相鄭覃曰昔
晉武以採擇之失中原由此解體千古可為殷鑒矣

唐會要卷三

欽定四庫全書

唐會要卷四

宋 王溥 撰

儲君

太子建成高祖長子武德元年六月七日冊為皇太子
九年六月四日見殺追封息王初武德元年六月萬年
縣法曹孫伏伽上疏諫曰臣聞性相近而習相遠以其
所好相染故也皇太子及諸王等左右羣僚不可不擇

而任之但是無德義之人家門不能邕睦及好奢華馳騁嫚遊聲色不得使親而近之臣歷觀往古下覽近代至于子孫不孝兄弟離間莫不為左右亂之願陛下選賢才以為皇太子僚友如此則克崇磐石永固維城矣中山王承乾太宗長子武德三年六月封恒山郡王五年八月徙封中山郡王九年十月立為皇太子貞觀十七年四月六日廢為庶人居黔州十八年十二月二日薨開元二十四年追封恒山郡王諡曰愍初貞觀十三

年黃門侍郎劉洎上疏曰太子生于深宮之中長于婦人之手未嘗識憂懼無由曉風俗雖復神機不測天縱生知而開物成務終由外獎是故周儲上哲思望爽而加裕漢惠深仁引綺園而昭德原夫太子宗祧是繫善惡之際興亡斯在苟不勤始將悔于終故晁錯上書令先通政術賈誼獻策務前知禮教臣今不曲陳故事請以聖德言之陛下多才多藝允武允文尚且雖休勿休日慎一日求異聞于振古勞勩思于當年乙夜觀書

事高漢帝馬上披卷勤過魏后陛下自勵如此而令太子優游臣所未喻一也加以暫屏機務即寓目雕蟲屈宋不足以升堂鍾張何階于入室陛下好古如此而令太子悠然靜處不尋篇翰臣所未喻二也備該衆妙獨秀寰中猶晦天聰俯詢凡識聽朝之隙引見羣臣降以溫顏訪以今古陛下自行如此而令太子久入趨侍不接正人臣所未喻三也若謂無益則何事勞神若謂有成則宜申貽厥蔑而不急未見其可上遂勅劉洎令與岑文

本馬周遞日往東宮與太子談論十六年二月諫議大夫褚遂良諫曰昔聖人制禮尊嫡卑庶謂之儲君道亞霄極其為崇重用物不計泉貨財帛與王者共之庶子體卑不得為例所以塞嫌疑之漸除禍亂之源也先王必本人情然後制法知國家必有嫡庶然後庶子雖愛不得超越嫡子正禮特須尊崇如當親者疎當尊者卑則佞巧之奸承機而動私恩害公或至亂國臣伏見東宮物料歲得四萬段出市貨賣凡直一萬一千貫魏王

年別封及廩物一年凡直一萬六千貫文此便儲君料物翻少藩王朝野聞見以為非是昔漢明帝披輿地圖等諸國戶口令諸子租歲不過二千萬明德馬后為言亦不偏得此則防其嗜欲節其驕恣伏願陛下頗擇漢法弘此無偏儲君之用微附古昔則天下幸甚因詔曰儲貳不會自古常式近代以來多為節限求之故實深非事宜自今皇太子出用庫物所司勿為限制至其年八月十四日上謂侍臣曰當今國家何事最急各為我

言之右僕射高士廉曰養百姓最急黃門侍郎劉洎曰撫四夷最急中書侍郎岑文本曰行禮義最急諫議大夫褚遂良曰即日四方仰德誰敢為非但太子諸王須有定分陛下宜為萬代法以遺子孫上曰此言是也朕年將五十已覺衰急既以長子守器東宮弟及庶子數將五十心常憂慮頗在此耳但自古嫡庶無良佐何嘗不傾敗家國公等為朕搜訪賢德以輔儲君爰及諸王咸求正士且人事歲久則分義情深非意窺覷多由此

作于是限王府官寮不得過四考十七年三月左屯衛中郎將季安儼上表言皇太子及諸王陛下處置未為得所太子國之本也伏願深思遠慮以安天下之情上曰我識卿意我兒雖患脚猶是長嫡豈可舍嫡立庶乎燕王忠高宗長子貞觀二十年八月封陳王永徽三年七月冊為皇太子六年十一月武后既立禮部尚書許敬宗奏曰臣聞元儲以貴立嫡之義尤彰罔敢同名正本之文愈顯既而皇后生子合處少陽出自塗山是為

吾君之子夙嫺胎教宜展問豎之心乃復為孽奪宗降
居藩邸臣以愚誠竊所未喻且今之守器素非皇嫡永
徽爰始國本未生權引彗星越升明兩近者元妃載誕
嫡嗣降神重光日融熾火宜息安可以濫茲皇統叨據
大器國有諍臣孰逃其情竊惟息姑克讓可以思齊劉
強守藩宜遵往軌追踪泰伯不亦可乎踵武延陵固當
安矣寧可反植枝幹久易位于天庭倒襲衣裳使違方
于震位蠢爾黎元于誰係心垂裕後昆將何播美且父

子之際人所難言事或犯鱗必嬰嚴憲伏自思忖荷盼
前朝引于陋巷之中申以後車之禮雲臺畫像十有八
人三紀于茲惟臣僅在常思勉力少報鴻恩今茲冢嗣
執珪下枝當璧孟侯淪屈大典未申臣既分職文昌典
司嘉禮位陪宗伯不敢曠官効命之秋宜在茲日及召
見上曰卿朕之伯夷立嫡之義在禮何如對曰正國本
則萬事理皇太子國之本也本猶未正萬國無以係心
東宮者所出本微今知國家已有正嫡必不自安竊位

而懷疑恐非宗廟之福也願陛下熟計之上曰忠已自讓對曰能為泰伯願速從之顯慶七年正月六日降為梁王官寮皆懼罪亡匿無敢見者太子右庶子李安仁獨候忠泣涕拜辭而去時論美之

章懷太子賢高宗第六子永徽六年正月封潞王龍朔元年九月二十日改封沛王咸亨二年五月十三日勅尚書省與奪事及須商量拜奏事等文案並取沛王賢通判其應補擬官及廢置州縣并兵馬刑法等事不在

判限三年九月改名德徙封雍王上元二年六月三日
改名賢冊為皇太子調露二年八月二十日廢為庶人
唐隆元年七月七日追贈太子諡曰章懷賢初封潞王
為幽州都督始出閣容止端雅高宗深所歎賞謂司空
李勣曰此兒已讀得尚書禮記誦古詩賦復千餘篇暫
經領覽遂即不忘我曾遣誦論語至賢賢易色遂再三
覆誦我問何為如此乃云性愛此言及為皇太子令監
國處分明審為時所稱儀鳳中手勅褒美賢又令右庶

子張大安等注范氏後漢書表上之賜物三萬段仍以
其書付秘閣時正議大夫明崇儼以符劾之術為則天任
使密稱英王狀類太宗又宮人潛議云賢是后姊韓國
夫人所生賢亦自疑懼則天又嘗撰少陽政範及孝子傳以
賜之仍數作書以責讓及崇儼為盜所殺則天疑賢所
為又使人發其陰事詔中書侍郎薛元超黃門侍郎裴
炎御史大夫高智周與法官推鞠之于東宮馬坊搜得
皂甲數百領乃廢為庶人幽于別所

節愍太子重俊中宗第三子聖曆三年臘月封義興郡王神龍元年二月十九日徙封衛王二年七月五日冊為皇太子三年七月五日兵敗自殺唐隆元年六月二十五日贈太子景雲元年七月諡節愍十一月陪葬定陵

廢太子瑛玄宗第二子本名嗣謙景雲元年九月二日封真定郡王先天元年八月十一日進封郢王開元二年十二月十七日冊為皇太子十三年三月十日改名

鴻二十三年七月改名瑛二十五年四月二十二日廢
為庶人初二十三年將廢太子謀于宰臣張九齡曰太
子天下之本也動之則搖人心且太子之在東宮未聞
大惡臣聞父子之道天性也有過父恕而掩之無宜廢
絕且其狀未著恐外人窺之傷陛下慈父之道寶應元
年五月十九日勅宜復舊封皇太子初瑛母趙麗妃有
才貌善歌舞玄宗在潞州甚寵遇及武惠妃寵幸麗妃
恩顧漸薄時鄂王瑤母皇甫德儀光王琚母劉才人皆

玄宗在臨淄邸得幸及惠妃承恩鄂光之母亦漸疎薄
于是璵與鄂光自謂母氏失職常有怨望遂為李林甫
及駙馬楊回所誣玄宗震怒並廢為庶人俄又賜死天
下冤之後惠妃屢見三庶人為祟

惠昭太子憲寧宗長子元和元年八月封為郢王四年
閏三月立為皇太子六年十二月薨諡曰昭惠

莊恪太子永文宗長子太和四年四月封魯王七年八
月立為皇太子開成三年十月薨諡曰莊恪

皇太子裕昭宗長子大順三年六月二十八日封德王
乾寧四年二月十一日冊為皇太子天祐元年薨

雜錄

貞觀十六年六月西苑丞穆格農園不修太宗怒甚命
于朝堂斬之侍臣戰慄莫敢進言太子承乾諫曰人者
有生最靈一死不可復活命即斬之理恐未盡請付法
司推鞠太宗意解即笞而釋之長孫無忌進曰陛下發
天威之怒太子犯顏進諫斯誠四海之福太宗曰自朕

御天下虛心正人即有魏徵朝夕納諫自徵云亡劉洎繼之太子幼在朕前每見規諫者常心悅之染以成性故有今日之諫耳

十七年閏六月詔曰皇太子地惟儲副寄深監撫兼統禁旅是允舊章宜知左右屯營兵馬事大將已下並受處分十九年高士廉劉洎等表稱皇太子與百官書疏先無禮式請詳定其儀詔曰皇太子地在震方禮絕羣后而令書法式未著曩章近代以來例皆明白謙過逼下書依衆庶

無以別貴賤之差將何顯尊卑之序理非通允宜有更張
凡事處分論事之書皇太子並宜畫令左右庶子以下署
名宣奉行書按畫日其餘與諸親及師傅等書不在此限
二十年太宗于寢殿側置一院令太子居之絕不遣往東
宮門下侍郎兼太子賓客褚遂良上疏諫曰臣聞周家
問安三至必退漢儲視膳五日乃來禮曰男子十年出
就外傳出宿于外學書計然則古之達者豈無私愛欲
使成立凡人尚猶如此況君之世子乎且朋友不可以

深交深交必有怨父子不可以溺愛溺愛或生愆伏願
遠覽殷周近遵漢魏常許旬日半月遣還宮專學藝以
潤身布芳聲于天下則微臣雖死如生之年太宗從之
長安三年太子詹事崔神慶上表曰臣伏思五品以上
所以帶龜者比為別勅徵召恐有詐妄內出龜合然後
應命況太子元良國本萬方所瞻古來徵召皆用玉契
此誠重慎之極防萌之慮臣昨見緣突厥使見太子合
預朝參直有文符下宮曾不降勅處分太子當時又報

臣曰昨日至晚侍奉不見聖人諭及遣來今者直準臺符入朝事得妄否臣伏思禮司儀注例皆奏聞臺符所下必將非妄臣又自到朝堂審知是實所以太子遽往當今人稟淳化內外同心然古人慮事于未萌之前所以長無悔吝之咎臣愚見太子既與陛下異宮伏望召太子先報來日非朔望朝參應須宣喚伏望降墨勅及玉契以符重慎之道

開元十六年五月勅所選皇太子及諸王等妃既是百

官子女禮合避人今追就府縣及過本司未為得所其應預妃者宜令所司具名錄奏各令女及近親隨使于命婦朝堂待進止

乾元元年四月代宗自楚王改封成王張皇后有子數歲陰有奪宗之議宰臣李揆因見對肅宗從容謂曰成王嫡長有功今當命嗣卿意如何揆拜賀曰陛下言及于此社稷之福天下幸甚不勝大慶肅宗喜曰朕計決矣

建中元年二月國子司業歸崇敬上言準制皇太子時幸太學行齒胄之禮者伏請每至春秋國學釋奠之時所司先奏聽進止其釋奠齒胄之禮如開元禮或有未盡請委禮儀使更以古議詳定聞奏

貞元中裴延齡韋渠牟以姦佞相次選用延齡尤狡險判度支務剋剥聚斂自以為功天下怨怒陸贄李充以讒毀受譴陽城等伏闕懇諭幾至得罪順宗在東宮每進見輒言延齡輩不可用而諫臣可獎德宗卒不相渠

牟延齡而宥城等者東宮之力也德宗嘗泛舟魚藻宮
水嬉命皇太子升舟舟具皆飾以金碧丹青婦人盛飾
操舟光彩耀燭衆樂俱發德宗顧太子今日如何曰極
盛然後退以奢諫德宗不悅焉

貞元二十一年四月冊廣陵王為皇太子時德宗即位
已久而臣下未有親奏對者內外咸言王係王叔文專
行斷決日有異說又屬頻陰雨皆以為羣小用事之應
及將行冊禮之時雨乃止天景清明有慶雲見識者以

為天意所歸及覩皇太子儀表班行悚動退無不相慶
至有感而泣者道路歡悅遞相傳告中外有屬焉

元和五年二月太常禮院奏百官避皇太子名諱詳禮
經公卿大夫與太子同名無嫌蓋尊統于上太子同在
臣子之列國朝故事東宮官號并東宮殿及門名與太
子名同皆改然無百官避東宮名者德宗在春宮處州
舊名不改并御史院中同名者亦不改伏以宮臣名及宮
殿門名并百官宗姓中有與皇太子名同者即于儀制體

合迴避臺官及王公爵土名號推義比例並無改文詔可
六年閏十二月皇太子薨前四年有司將行冊禮以孟秋
再卜日臨事皆以雨而罷至十月方就廷冊纔二週歲而
薨十二月三十日皇太子侍讀諫議大夫韋綬奉皇太子
學書至依字輒去其傍人字臣問其故答曰君父每以此
字可天下之奏臣子豈合書之上深嘉歎之其年五月韋
綬罷侍讀綬好諧戲兼通人間小說太子因侍上或以綬
所能言之上謂宰臣曰侍讀者當以經術傳導太子使知

君臣父子之教今或聞韋綬談論有異于是豈所以傳導太子者因此罷其職尋出為處州刺史其年十二月惠昭太子薨命國子司業裴蒞議廢朝禮蒞奏故事無皇太子薨禮請輟視朝十二日盖用期服易月之制也七年惠昭太子既薨穆宗時為遂王憲宗以澧王居長又多內助將建儲貳命翰林學士崔羣與澧王作讓表羣執奏曰大凡已合當之則有陳讓之義若不合當因何遽有讓表今遂王嫡子長所宜正位青宮乃從之

及後穆宗

即位拜吏部侍郎召見別殿謂之曰我升儲位之時卿為羽翼羣奏曰先帝之意元在陛下頃者授陛下淮西節度使臣奉命草制且曰能辨南陽之曠允符東海之貴若不知先帝深旨臣豈敢輕言

長慶二年十二月上御紫宸殿冊皇太子故事冊太子御宣政殿時以聖體未康慮勞登御故從便也是日備宮懸于殿庭列內仗于兩閣門內羣臣辨色序立于宣政門外俄就外廊食訖始具衣冠劔履入自月華門列位于正衙辰後一刻方入閣上臨軒復以中官列侍太子步自崇明門以宮寮翼從駙馬二人扶衣冠禮儀使

導以進及樂作扇開羣臣拜訖太子進至龍墀東南再拜受冊攝中書令杜元穎跪讀冊文訖以授太子太子再拜舞蹈乃歸于崇明門幕殿羣臣賀皇帝訖退詣崇明門謁太子太子命舉簾執笏答拜宮寮拜則受之

開成元年五月中書門下奏臣等累奉德音令與皇太子於甲族選妃家今商量于兩都及側近精擇甲族可以選尚者勅冢嗣元良家國之慶人倫之始在娶元妃雖吉事尚更于待年而嘉偶宜深于善教至于先定冀

選義方屬在德門遂成好合在東京委裴度西京委宰
臣各申旨諭兩月內送中書門下

三年十月莊恪太子薨太常禮院奏皇太子薨禮儀至
重諸祠祭除天地社稷之外並合權停其天地社稷祭
日懸而不樂虞祭已後却依常式從之

追諡太子

懿德太子重潤

中宗長子
本名重照

惠莊太子撝

睿宗第
二子

惠文太

子範

睿宗第
四子

惠宣太子業

睿宗第
五子

靖恭太子琬

玄宗第
六子

恭懿太子侶

肅宗第十二子

昭靖太子邈

代宗第三子

文敬太子諒

德宗之子本順宗子

懷懿太子湊

穆宗第三子

悼懷太子普

上愛念之養為子

敬宗長子靖懷太子漢

宣宗第二子會昌六年封王大中六年薨追諡靖懷

雜錄

懿德太子生于東宮內殿高宗甚悅及滿月大赦改元永淳是歲立為皇太孫開府置官屬及中宗遷于房州其府廢中宗為皇太子封為邵王大足元年為人所搆與其妹永泰郡主壻魏王武延基等竊議張易之兄弟

何得恣入宮中則天命杖殺之年十八重潤風神俊朗
早以孝友知名既死非其罪大為當時所惜中宗即位
追贈皇太子諡曰懿德陪葬乾陵仍為聘國子監丞裴
粹亡女為冥婚與之合葬

惠莊太子撫初生則天嘗以示僧萬迴萬迴曰此兒是
西域火樹之精養之宜兄弟則天甚悅始令列于兄弟
之次

惠文太子範好學工書雅愛文章之士無貴賤皆盡禮

接待與閭朝隱劉延琦張諤鄭繇篇題唱和多聚書畫
古蹟為時所稱上禁約王公不令與外人交結駙馬都
尉裴虛已坐與範遊讌兼私挾讖緯之書配徙嶺外萬
年尉劉雅稱風格秀整時士庶冀有所成功忽然殂謝
遠近失望焉

皇太孫

貞觀十七年十一月二十八日誕皇太孫宴宮寮于弘
教門太宗幸東宮自殿北門入謂宮臣曰頃來生業稍

可非乏酒食而唐突公等宴會朕有甲觀之慶故就卿
為樂耳謂太子曰爾國之儲貳府藏是同金玉綺羅不
足為賜但先聖典籍可為鑑誡耳因賜尚書毛詩孝經
各一部太子太傅蕭瑀曰今所賜書請陳其要旨申明
義趣可為深誠者皆委曲言之上大悅以為師傅得人
永淳元年三月十五日立皇孫重照為皇太孫將置府
寮上召吏部侍郎裴敬尋郎中王方慶問今立太孫前
代故事如何方慶進曰臣按周禮有嫡孫漢魏以來皇

太子在亦不立太孫但封王耳晉太康元年立愍懷太子第二子臨淮王臧為皇太孫永寧元年立愍懷太子第三子襄陽王尚為皇太孫太子官屬即轉為太孫官屬齊永明十年立文惠太子長子南郡王昭業為皇太孫使居東宮今皇太子在而立太孫旁求載籍未有前例上曰自我作古可乎對曰可三王不襲禮五帝不沿樂苟不失上下之序虧政理之道亦何事而不可詩曰詒厥孫謀以燕翼子禮曰君子抱孫不抱子孫可以為王父

尸以其昭穆同也今陛下肇建皇孫創斯盛典所以彰
子孫千載之盛福祚靈長之應也上悅使方慶詳求典
故官屬員品乃奏太孫府置師傅及文學祭酒及左右
長史東西曹掾主簿管記司錄以下六曹從事等官各
加王府一級上後頗以為疑竟不補授而止也

憲宗皇帝六七歲時德宗抱置膝上謂曰汝是何人在
吾懷中對曰第二天子也上大驚喜由是重之

唐會要卷四

欽定四庫全書

唐會要卷五

宋 王溥 撰

諸王

舊制親王食封八百戶有至一千戶公主三百戶長公主加十戶有至六百戶高宗朝以沛英豫三王及太平

公主武后所生食封逾於常制垂拱中太平公主

一千二百

戶聖歷初相王太平公主

各三千

長安中壽春王兄弟五人

各三百

欽定四庫全書

卷五

百神龍初相王太平公主

各加至五千戶

衛王

三千戶

溫王

二千戶

成王

七百戶

壽春公主

加至七

百戶

嗣雍王衡陽王臨淄王巴陵

王中山王

加至七

安樂公主

二千戶

長寧公主

一千五百戶

宣

城公主宜城公主以下

各一千戶

定安公主

一千戶

相王女為

縣主者

各三百戶

衛王升儲位相王

又加至七百戶

太平公主

加至五百

戶前已封五千戶此特更加耳

安樂公主

加三千戶

長寧公主

加至二千五百戶

宜

城公主以下

各加至二千戶

唐隆初嗣雍王壽春王封為親王

各加至一千戶

開元中寧王

二千五百戶

岐王薛王

各五百戶

申王

四千戶

邠王

一千八百戶

皇妹為公主

一千戶

咸宜公主

加至一千戶

其後

皇子封王者

二千戶

皇女為公主者

五百戶

又諸皇女為公

主者

例加一千戶

其封數神龍中相王太平長寧安樂公主

皆以五千為限雖水旱亦不破色以正租庸充數開元

以後以四千為限初貞觀中高宗為晉王以文德皇后

最小子於后崩後累年太宗憐之竟不令出閣高宗朝睿

宗為殷豫王雖長成亦以則天最小子不令出閣嗣聖

篡大位聖歷初封為相王始出閣中宗時以燕王重福

失愛出遷外藩衛王重俊為太子又與成王千里等起兵將誅韋后故溫王重茂雖年十六七竟亦居宮中先天之後皇子幼則居東內封後以年漸長成乃於安國寺東附苑城同為大宅分院居之名為十王宅令中官押之於夾城中起居每日家令進膳又引詞學工書之士入教謂之侍讀十王謂慶忠棣鄂榮光儀潁永濟蓋舉全數其後盛儀壽陳豐恒涼六王又就封入內宅開元二十五年鄂光得罪忠王繼大統天寶中慶棣又歿

唯榮儀十四王居內而府幕列于外坊歲時通名起居而已外諸孫長成又於十宅外置百孫院每歲幸華清宮側亦有十王宅百孫院十王宮人每院四百餘人百孫院三四十人又於宮中置維城庫諸王月俸物納之以給用諸孫納妃嫁女亦就十宅中太子不居於東宮但居于乘輿所之別院太子之子亦分院而居婚嫁則同親王公主於崇仁里之禮院

高祖二十一王衛王玄霸

追諡懷

巢王元吉

建威同謀伏法諡刺

楚王

智雲荆王元景

房遺愛同謀伏法

漢王元昌

承乾同謀伏法

豐王元亨

周王元方徐王元禮韓王元嘉

事具雜錄

彭王元則

諡曰忠

鄭

王元懿

諡惠

霍王元軌虢王元鳳道王元慶

諡孝

鄧王元裕

諡康

魯王靈夔舒王元名

丘神勣所陷死非其罪

江王元祥

諡安

密王

元曉

諡貞

滕王元嬰

太宗十三王楚王寬吳王恪

事具雜錄

王泰

諡恭

齊王祐

諡人

蜀王愔

諡庶人悼

蔣王暉

為人誣告愔恐自殺

越王貞

事具雜錄

紀王慎江

王囂

諡殤

趙王福曹王明

庶人賢通謀徒於黔州而自殺

代王簡

高宗三王原王孝

諡悼

澤王上金

周興誣告
恐懼自殺

許王素節

事具

錄 雜

中宗一王譙王重福

謀反
伏法

睿宗一王隋王隆悌

玄宗十九王棣王琰鄂王瑤

得罪
自殺

光王琚

為人誣告
死非其罪

夏

王一

事具
雜錄

儀王璿穎王璿懷王敏

諡哀

永王璘

事具
雜錄

壽王

瑁延王玢盛王琦濟王環義王珣信王理豐王珙

言不

遜賜死

恒王瑱涼王璿汴王璿

肅宗十一王越王係西平王佖

追封衛王

彭王僅堯王倜涇

王健襄王儋靈昌王榮杞王倕邵王惲定王侗淮陽王

僖

追封宗王

代宗十八王均王遐

追封

睦王述丹王逾恩王連韓王迥

簡王邁忻王造韶王暹嘉王運端王遇恭王通循王適

原王達雅王逸隋王迅益王迺荆王選

追封

蜀王邈

德宗九王舒王誼

本名謨

通王譔虔王諒肅王詳資王謙

代王誼

始王縉雲

昭王誠欽王諤珍王誠

順宗二十王鄴王經均王緯淑王縱密王綢莒王紆郇

王綜邵王約宋王結集王緡冀王綽和王綺欽王績衡

王綯

舊唐王在
欽王績上

會王纁福王綰

舊唐書福王綰
下有珍王綬

撫王紘

岳王緄袁王紳桂王綸翼王綽

舊唐書翼王綽
下有勣王緄

憲宗十五王澧王暉深王惊洋王忻絳王悟建王恪鄜

王憬瓊王悅沔王恂婺王懌茂王愔淄王協衡王儋澶

王恍彭王暢棣王湍

穆宗一王安王溶

敬宗四王梁王休復襄王執中紀王言揚陳王成美

成開

四年十月立為皇太子
求行冊禮尋降為陳王

文宗一王蔣王宗儉

武宗四王益王峴兗王岐德王嶧昌王嵯

宣宗十一王郢王洞雅王涇衛王灌夔王滋慶王沂濮

王澤鄂王潤懷王洽昭王汭康王汶廣王滄

懿宗六王魏王侑涼王伋蜀王佖威王侃吉王保

文德九年

授開府儀同三司檢
校太傅食邑三百戶

睦王倚

僖宗二王建王震益王陞

昭宗八王虔王禊沂王禔遂王緯景王祕祁王祺雅王

禎瓊王祥棣王栩

並乾寧五年四月封

雜錄

韓王元嘉少好學聚書至萬卷皆文句詳定秘府不及
又愛碑文古跡多得異本閨門修整有類寒素與其弟
靈夔相友愛兄弟相見如布衣之禮修身潔已內外如
一當代諸王莫能及者唯霍王元軌抑其次馮元嘉子

黃國公譔少以文才稱諸王子之中與瑯琊王沖為一時之秀

霍王元軌初為蜀王徙封吳王後為霍王太宗嘗問羣臣曰朕子弟孰賢侍中魏徵對曰臣愚昧不盡知其能唯吳王數與臣言未嘗不自失上曰朕亦器之卿以為前代誰比徵曰經學文雅亦漢之閒平也由是寵遇彌厚因令妻徵女焉又嘗從太宗遊獵遇羣獸命元軌射之矢不虛發太宗撫背曰汝武藝過人恨今無所施焉

當天下未定我得汝豈不安乎太宗崩去職毀瘠過禮
自後常布衣示有終身之戚焉每至忌辰輒數日不食
後徙封霍王為絳州刺史遷徐州元軌前後為刺史唯
閉閣讀書吏事責成於長史司馬謙慎自守與物無忤
不妄接士在徐州日唯與一處士劉玄平為布衣之交
人或問玄平王之所長答曰無問者往而復之玄平曰
夫人有短所以見其長至於霍王無所不備吾何以稱
之哉為定州刺史有突厥來寇元軌令開門偃旗寇疑

有伏懼而宵遁州人李嘉運與賊連謀事洩高宗令收按其黨元軌以強寇在境人心不安唯殺嘉運餘無所及因自劾違制上覽表大悅謂使者曰朕亦悔之向無王則失定州矣有王文操者遇賊二子鳳賢以身蔽捍文操獲全二子皆死縣司抑而不申元軌察之遣使弔祭表其事詔並贈朝散大夫令加旌表其禮賢愛善如此後因入朝屢上表陳時政得失多有匡益高宗甚尊重之及在外藩朝廷每有大事皆密制問焉高宗崩與

侍中劉齊賢等知山陵事齊賢服其諳練謂人曰非我輩所及元軌嘗使國令徵封令白請依諸國賦物貿易取利元軌曰汝為國令當正吾失反說吾以利耶拒而不納

道王元慶歷趙豫滑徐沁衛州刺史皆以政聞事無不謹及母薨請躬修墳墓優詔不許

鄧王元裕好學善談名理與典籤盧照鄰為布衣之交舒王元名聰悟高祖在大安宮時太宗晨夕使尚宮起

居送珍饌元名保傳等謂元名曰尚宮有品秩高者見
宜拜之元名曰此我二哥婢也何用拜為太宗聞而壯
之曰此真我弟也封王之後歷數郡刺史元名性高潔
罕問家人產業朝夕矜莊門庭清肅嘗誡其子豫章王
亶等曰藩王所乏不慮無錢財官職但勉行善事忠孝
持身此吾志也及亶為江州刺史以善政聞高宗手勅
褒美元名以賞其義方之訓高宗每欲授元名大州刺
史固辭曰忝預藩戚豈以州郡戶口為仕進之資辭情

懇到故在江州向二十年賞玩林泉有塵外之意垂拱中轉青州又拜鄭州州境鄰接都畿諸王及帝戚涖官者或不檢攝家人為百姓所苦及元名到大革其弊

江王元祥貪鄙多聚金寶營求無厭為吏人所患時滕王元嬰蔣王惲號王鳳亦以貪暴為人惡之有授得其府官者以比嶺南惡處謂之語曰寧向儋崖象白不事江滕蔣號

滕王元嬰為金州刺史頗驕縱動作無度高宗與書誡

之曰王地在宗支寄深磐石幼聞詩禮夙奉義訓實冀孜孜無怠漸以成德豈謂不遵軌轍踰越典章且城池作固以備不虞闔鎖閉開須有常準鳩召散樂并集府寮嚴闕夜開非復一度遏密之悲尚纏比屋王以此情事何紛紜又巡省百姓觀風問俗遂乃驅率老幼借狗求鷹志從禽之娛忽黎元之重時方農要屢出畋遊以擾百姓將為笑樂取適之方亦應多緒何必此事方得娛歡晉靈虐主未可取則趙孝文趨走小人張四郎優

倡賤隸王親與博戲極為輕脫一府官寮何所瞻望凝
寒方甚以雪埋人虐物既深何以為樂家人奴僕侮弄
官人至於此事彌不可長朕以骨肉至親不欲致王於
法今與王下上考以愧王心人之有過貴在能改國
有憲章私恩難再興言及此慙抱盈懷

吳王恪授安州都督及將赴職太宗以書誡之曰吾君
臨億兆表正萬邦汝地居茂親當維藩屏勉思橋梓之
道善侔間平之德以義制事以禮制心三風十愆不可

不慎如此則勉強磐石永一維城外為君臣之忠內有父子之孝宜自勵志以勗日新汝方違膝下懷戀何已欲遺汝珍玩恐益驕奢故誠此一言以為庭訓恪有文武才太宗嘗稱其類已既名望素高甚為物情所向長孫無忌輔立高宗深所忌嫉永徽中會房遺愛謀反遂因事誅恪以絕衆望四海寃之

太宗以魏王泰愛好文學特令就府別置文學館任自召引學士又以泰腰股洪大趨拜稍難復令以小輿舁

至於朝所其寵異如此後司馬蘇勗以自古名王多引
賓客以著述為美勸泰請撰括地志遂奏引著作郎蕭
德言等就府修撰數歲方畢及上表之日詔令付秘閣
賜泰物萬段德言等賜物有差貞觀十六年四月詔泰
移居武德殿泰為太宗所愛禮秩如嫡魏徵上疏諫曰
陛下愛魏王宜使知定分抑其驕奢不處嫌疑之地今
武德殿近儲后馬上陵下替不可以訓太宗曰我幾錯
誤遂遣泰歸本第十七年五月上親謁太廟以謝承乾

之過魏王泰以罪降爵為東萊郡王太宗因謂侍臣曰
自今太子不道藩王窺伺者兩棄之傳之子孫以為永
制於是列宮寮等各以大義責之流降有差初承乾既
廢魏王泰因入侍奉太宗面許立為太子翌日謂侍臣
曰泰昨入見自投我懷中云臣今日始得與陛下為子
是更生之日臣有一孽子臣百年之後當為陛下殺之
傳國晉王父子之道固當天性我見其如此甚憐之褚
遂良進曰陛下失言伏願審思無令錯誤也安有陛下

百年之後魏王持國執權為天下主而能殺其愛子傳國晉王者乎陛下比者立承乾為太子復寵魏王愛之踰嫡嫡庶不分所以至今日既立魏王伏願陛下別安置晉王始得全矣太宗涕泗交下曰我不能因起入內是日太宗御兩儀殿羣臣盡出詔司徒長孫無忌司空房玄齡兵部尚書李勣諫議大夫褚遂良謂曰我三子一弟所為如此我心無聊因自投於床無忌等爭趨抱持太宗抽佩刀無忌驚懼遂良於太宗手中爭取佩刀

以授晉王無忌等請太宗所欲立曰我欲立晉王無忌
曰謹奉詔有異議者臣請斬之太宗謂晉王曰舅許汝
矣汝宜拜謝晉王因下拜太宗於是御太極殿召文武
六品以上告立晉王為太子羣臣皆蹈舞稱慶

詔幽魏
王於北

苑

蜀王愔累授襄州刺史益州都督嘗非理數繫所部縣
令又畋獵無度數為非法太宗怒曰禽獸調伏可以馴
擾於人鐵石鎔鍊可以成方圓之器至如愔者曾不如

禽獸鐵石乎乃削封邑及國官之半貶為虢州刺史後復加實封滿千戶愔在州數遊獵不避耒稼深為百姓所怨典軍楊道整叩馬諫愔曳而捶之後為御史大夫李乾祐所劾高宗謂荆王元景曰先朝擲風沐雨平定四方遠近肅清車書混一上天降禍奄棄萬邦朕纂承洪業懼如馭朽與王共戚同憂為國家主蜀王畋獵無度侵奪黎甿縣令無故被罰阿諛即喜忤旨便嗔如此居官何以共理歷觀古來諸王若能動遵禮度則流慶

子孫違越朝章則誅不旋踵惜為法司所劾朕實恥之
帝又引楊道整勞勉之拜為匡道府折衝都尉賜絹五

十疋

貶惜為黃
州刺史

蔣王暉自安州都督除梁州暉在安州多造器用玩具
及將行有車四百兩州縣不堪其勞

越王貞累授相州刺史貞善騎射涉文史兼有吏幹但
信讒言官寮有正直者多被貶退又縱諸僮豎侵暴部
民由是皆伏其才而鄙其行則天臨朝加太子太傅除

豫州刺史自則天稱制貞與韓王元嘉魯王靈夔霍王元軌等密有匡復之志垂拱三年七月遂各起兵赴神都則天命左豹韜衛大將軍麴崇裕等率兵十萬討之其衆大潰貞等首並梟闕下貞將起兵與壽州刺史駙馬都尉趙瓌書曰佇總義兵來入貴境瓌甚喜復許率兵相應瓌妻常樂公主高宗第七女和思皇后之母也謂其使者曰為我報王與其進不與其退爾諸王若是男兒不應至許時尚未舉動我嘗見耆老云隋文帝將

篡奪周室尉遲迴是周室外甥猶能起兵相州天下響
應況爾諸王並國之懿親宗社是託豈不學尉遲迴感
恩効節舍生取義耶夫為臣子若救國難則為忠不救
為逆諸王必須以匡救為急不可虛生浪死以笑於後
代及貞等敗瓌與公主伏誅貞長子冲好文學善騎射
歷密齊博三州刺史皆有能名與父貞相次舉兵七日
而敗神龍初侍中敬暉等以冲父子翼戴皇家義存社
稷請復其官爵武三思令昭容上官氏代中宗下手詔

不許開元四年詔追復爵土令備禮改葬太常請諡曰
敬昭從之五年又下詔封貞姪孫琳為嗣越王以奉其
祀仍為立碑至開成四年六月其裔孫女道士玄真護
先代數喪歸葬時論稱之因降勅曰越王事蹟國史著
明枉陷非辜尋已昭雪其孫珍子他事配流數代漂蓬
不還京國玄真女弱孝節卓然啓護四喪緇歷萬里況
是近屬必在加恩行路猶或嗟稱朝廷固用卹助宜委
宗正寺京兆府與訪越王墳報知如不是陪陵任祔塋

卜葬其事仍令京兆府接應必使備禮葬畢玄真如願
往京城使配咸宜觀安置

紀王慎為襄州刺史以善政聞璽書勞勉百姓為之立
碑慎少好學於文史與越王貞齊名時人號為紀越

許王素節六歲封雍王尋授雍州牧素節能誦古詩賦
五百餘言受業於學士徐齊聃精勤不倦高宗甚愛之
則天立為皇后每被讒嫉出為申州刺史乾封初詔曰
素節既患舊疾宜不須入朝而素節實無疾自以久乖

朝覲遂著忠孝論以見意時王府倉曹張柬之因使潛封此論以進則天見之不悅誣以贓賄降封鄱郡王仍於袁州安置累進封為許王舒州刺史天授中與澤王上金同被誣告追赴都臨發州聞遭喪哭者謂左右曰病死何由可得更何須哭行至都城南被縊死

夏王一母貞順武皇后為惠妃時生鍾愛無敵故名為一孩孺而薨時駕在東都葬於城南龍門東岑欲宮中舉目見之

永王璘數歲失母肅宗收養夜自抱之眠及玄宗幸蜀詔璘為山南東路及嶺南等道採訪使江陵郡大都督璘至江陵召募將士數萬人恣情補署江淮租賦破用鉅億以薛瑒李臺卿蔡駟為謀主因有異志肅宗聞之詔令歸覲於蜀璘不從命遂擅領舟師東下甲仗五千趨廣陵以李廣琛為將璘生宮中不更人事其子襄城王偁又勇而有力既握兵權為左右眩惑遂謀狂亂璘雖有窺江左之心未露其事吳郡採訪使李希言乃平

牒璘大署其名璘遂激怒牒報曰寡人上皇天屬皇帝
友于地尊侯王禮絕寮佐而簡書來往應有常儀今乃
平牒抗威落筆署字漢儀隳紊一至於斯乃使渾惟明
取希言李廣琛取廣陵採訪使李成式希言等各以兵
拒之先是肅宗以璘不受命使內官啖廷瑤等招討之
後兵敗將南投嶺南為江西採訪使皇甫侁下防禦兵
所擒因中流矢而死

壽王瑁母貞順武皇初后頻產夏王懷王及上仙公

主皆襁褓不育瑁之初生讓帝與妃武氏請於玄宗就宅收養自乳之名為己子十餘年在寧邸故封建晚於諸王邸中常呼為十八郎及讓帝薨瑁請制服以報乳養之恩玄宗從之

恒王瑱性好道常服道衣天寶末從駕幸蜀不復衣道衣矣

越王係乾元二年七月為天下兵馬元帥後與張皇后構異謀得罪

肅王詳德宗第五子建中五年薨性聰慧上尤憐之追
念無已詔如西域法造塔安置禮儀使判官司門郎中
李岩上疏曰墳墓之義經典有常自古至今無聞異制
層磚起塔始於天竺名曰浮圖行之中華竊恐非禮况
肅王天屬名位尊崇喪葬之儀存乎簡冊舉而不法垂
訓非輕伏請準令造墳庶尊典禮從之

唐會要卷五